

## **Amaruba ga Pahulu imwa Firimooni Indangiriro**

Yaga maruba, Pahulu akagayandikira Firimooni. Uyo Firimooni, âli yemiiri Yesu, anâli kizi koleesa abaja. Muguma wabo, Honesimo, akamúzimba (18), anabuli toloka. Ukukulikirana ne'maaja za'Barumi, Honesimo âli kwaniini ukuyitwa. Kundu kwokwo, Honesimo akabonaana na Pahulu, anayiji yemeera Kirisito (10). Ne'kyanya akalooza ukugalukira nahamwabo, Pahulu anamúyandikira, anamúyinginga kwo leero agayemeera ukuyakiira Honesimo nga mwene wabo mu kati ka Kirisito (16).

Imiziizi miguma yi'sikamiro, iri mu Firimooni 8-10: «Mukati ka Kirisito, mbandwirwi ukukubwira ku bukaruuke ngiisi kwo ukwiriiri ukugira. Kundu kwokwo, ngakuyinginga mu kati ko'rukundo. Yaga mahuuno, ugayakiire imwani nie Pahulu, nie ngola mushaaja, na ngoli shwesirwi mu nyumba ye'mbohe hi'gulu lya Yesu Kirisito. Kwokwo, nakuyinginga hi'gulu lya mwana wani Honesimo. Mukuba, ku kino kyanya ngoli shwesirwi ne'minyororo, aba mwana wani.»

*Íbiri mwo ku bwofi*

- a) Indangiriro (1-3)
- b) Firimooni (4-21)
- c) Pahulu aseezerana (22-25)

### *Indangiriro*

<sup>1</sup> Yaga maruba, galyoka imwani nie Pahulu, umushweke hi'gulu lya Yesu Kirisito. Twe na mwene witu wa Timoteyo, twe twakuyandikira, e Firimooni, we witu mukozi mukundwa.

<sup>2</sup> Twayandikira na'bandu bi'shengero, ábali mu kuumana mu nyumba yawe, mwe na mwali witu wa Hafya, na Harikipo, uwitu musirikaani wa Rurema.

<sup>3</sup> Daata Rurema, na Nahamwitu Yesu Kirisito, bakizi mughashaanira! Banakizi mûheereza no'mutuula!

### *Ibyo Pahulu ahuunira Firimooni*

<sup>4</sup> Ikyanya ndi mu huuna Rurema, ndi mu tanga kongwa imwage hi'gulu lyawe. <sup>5</sup> Mukuba, keera nayuvwa ngiisi kwo ubiisiri Nahamwitu Yesu kwo'bwemeere, na ngiisi kwo uli mu kunda abandu baage booshi. <sup>6</sup> Ndi mu huuna Rurema, kwe'kyanya uli mu yigiriza abandi kwo babiike Yesu kwo'bwemeere, kwo wenyene ulongage ukumenya ngiisi kwo tuli mu gashaanirwa mu kati kaage. <sup>7</sup> E mwene witu! Ikyanya mbwini ngiisi kwo uli mu kundana, na ngiisi kwo uli mu kania abandu ba Rurema mu mitima yabo, kuli mu njagalusa, na mbe ngoli holeziibwi.

### *Pahulu ahuunira Honesimo ulukogo*

<sup>8</sup> Mu kati ka Kirisito, mbangwirwi ukukubwira ku bukaruuke ngiisi kwo ukwiriiri uku-gira. <sup>9</sup> Kundu kwokwo, ngakuyinginga mu kati ko'rukundo. Yaga mahuuno, ugayakiire imwani nie Pahulu, nie ngola mushaaja, na ngoli shwesirwi mu nyumba ye'mbohe hi'gulu

lya Yesu Kirisito. <sup>10</sup> Kwokwo, nakuyinginga hi'gulu lyo'mwana wani Honesimo. Mukuba, ku kino kyanya ngoli shwesirwi ne'minyororo, aba mwana wani. <sup>11</sup> Mu siku ízikalenga, ndaabyo âli kizi kutabaala kwo. Halikago buno, akoli kuhitiiri akamaro. Kiri na naani, akoli kambitiiri kwakundi.

<sup>12</sup> Ku yukwo, kundu andyagagi ku mutima, nakugalulira ye. <sup>13</sup> Njubi loziizi kwo twangaberi-inwi hano. Kwokwo, bwo ngi shwesirwi hi'gulu lye'Myazi Miija, angandabaala, ho wangandabiri. <sup>14</sup> Kundu kwokwo, ndaabyo nangagira, útanazi mbanguula. Iri wangandabaala, kubaa-gage ku bulooze bwawe. Si kutabe ku njira yo'kuhambaazibwa.

<sup>15</sup> Ngeeka íbikatuma Honesimo akatee lyokaga imwawe ku kyanya kiniini, gira lyo mukalonga ukubeeranwa isiku zooshi. <sup>16</sup> Na buno, atagaaba nga muja wawe naaho. Haliko, akola agaaba nga mwene witu mukundwa mu kati ka Yesu. Ee! Bwo angola ku mutima, ka itali yo haahe kwo naawe agaaba mu mutima gwawe, mu kati ko'buja bwage, ne'ngingwe, bwo akola mwene witu mu kati ka Nahano kwakundi.

<sup>17</sup> Ku yukwo, iri wangaba uyibwini kwo tuli ne'ngoome twembi, umúyakiire bwija, nga kwo wanganyakiira nienyene. <sup>18</sup> Ne'ri hangaba hali igambo lyo akakuhubira kwo, kandi iri akuli mu mwenda, mbe nie ugayisuzo. <sup>19</sup> NIEHE PAHULU, NIE NAYANDIKA YIBI NO'KUBOKO KWANI NIENYENE, KWO NIE GAGUYISHULA. Kuguma na yibyoy, nakukengeeza kwo ukiri no'mwenda gwani, nagwo gwangatumiri wenyene ushuba

ugayitanga imwani. <sup>20</sup> Ku yukwo e mwene witu, undabaale mu kati ka Nahamwitu Kirisito! Unanjagaluse mu kati kaage.

<sup>21</sup> Yaga mahuuno go nakuyandikiraga hano, ndangaliiri kwo uganzimbaha. Nyiji kwo ugaa-gira kiri ne'ngingwe yago.

<sup>22</sup> Na kwakundi, nakuhuuna ugwanwe wandingaanza ho ngayiji handa. Mukuba, ndangaliiri kwo Rurema agaki ngalulira iyo munda imwinyu, ukukulikirana na'mahuuno giinyu.

*Amagambo go'kusezerana*

<sup>23</sup> Mwene witu Hepafura akulamusa. Ye tushwesirwi kuguma mwi'no nyumba ye'mbohe hi'gulu lya Yesu Kirisito. <sup>24</sup> Na'biitu bakozi, nabo bakulamusa. Mariko, na Harisitariko, na Deema, na Luka. <sup>25</sup> Nahamwitu Yesu Kirisito akizi mugashaanira mweshi, mu mitima yinyu!

**Ibibiriya: Igambo Iya Rurema mu ndeto  
ye'kifuliiru  
Fuliiru: Ibibiriya: Igambo Iya Rurema mu ndeto  
ye'kifuliiru (Bible)**

copyright © 2018 Wycliffe Bible Translators, Inc.

Language: Fuliiru

Contributor: SIL International (in Africa)

All rights reserved.

2020-11-17

---

PDF generated using Haiola and XeLaTeX on 21 Feb 2024 from source  
files dated 29 Jan 2022

871cddeb-c358-58e1-a46a-1b6006a51f3b